

Incumbensa Noi-Togni concernent l'introducziun da mesiras chantunalas envers personas che vulan registrar firmas u instituziuns en il Grischun

En noss chantun s'augmenta il dumber d'abus en il sector commercial e schizunt en ils secturs da la sanadad e da l'educaziun cuntinuadamain – malgrà ch'ins ha prendì dacurt mesiras cunter quai. Ils cas d'abus, ch'èn d'attribuir a firmas ed ad instituziuns criminalas u pseudocriminalas, capitan sin donn e cust da personas da buna fai che na sminan nagut; percenter è il maun public dumandà cuntinuadamain da sa participar als custs da scussiuns e da concurs. Tut quai capita en noss chantun ed apparentamain cun il consentiment da las autoritads e da l'administraziun chantunala. I dat numerus exempels en chaussa: L'ultim cas concerna l'engion d'ina pseudo-universitad a Mustér, sin donn e cust d'ina gruppa da studentas e students talians e sin donn e cust da la reputaziun da noss chantun. Gia il schaner 2017 avevan funcziunaris tessinais avertì noss chantun ch'i vegnia manà en il Tessin in process cunter las personas responsablas dad UniPoliSI e ch'ins stoppia disfidar da questas personas. Quest exempel mussa che la comunicaziun tranter il Tessin ed il Grischun na basta betg per evitar ch'i s'installeschian qua firmas u instituziuns che han en emprima lingia la finamira da far engions ed extorsiuns. Igl è remartgabel che questas personas (burgaisas talianas) èn arrestadas en il Tessin, ma figureschan anc adina en il register da commerzi dal chantun Grischun sco possessuras d'ina universitad a Mustér – malgrà il scandal, sur dal qual las medias svizras e talianas han rapportà detagliadamain. En il register da commerzi dal chantun Grischun cumpara ultra da quai anc adina ina fundaziun (Fondazione OASIS) cun sedia a Cama en il Moesano: Cunter la persuna da contact (burgaisa taliana) da questa fundaziun è vegnì manà l'onn 2017 en il Tessin in process e questa persuna è vegnida sentenziada pervia d'in cas d'engion dad 1,2 milliuns a disfavur da l'assicuranza sociala. Ella pratigava tranter auter assistenza al suicidi (turissem da mort) ed aveva commess er auters malfatgs. En il parlament tessinais è vegnida inoltrada questa emna ina intervenziun parlamentara en quest reguard.

Quests exempels – sco er tut quai che las medias svizras (p.ex. Tagesanzeiger) e talianas (p.ex. RAI 1, RAI 3, Sole 24Ore / enquistas) han rapportà ils mais passads davart las firmas da chaschas da brev e davart las firmas che fan cuntinuadamain concurs e vegnan fundadas d'in cuntin da nov, cun l'unica finamira da prender d'avent daners da burgaisas e burgais che na sminan nagut sco er dal stadi – è fatgs ch'èn gia vegnids discutads en quest cussegl grond e che pretendan mesiras da protezzion, saja quai per las burgaisas ed ils burgais sco er per il stadi. E quai betg sco ultim per mantegnair il bun num dal chantun e da l'entir pajais.

Perquai pretendain nus ch'i vegnian prendidas tut las mesiras che stattan a disposiziun al chantun Grischun, per ch'i vegnia realisada ina prevenziun bain structurada ed efficazia cunter la criminalitad organisada e cunter cumportaments criminals, cun l'intent da proteger la populaziun sco er il bun num dal chantun e da sia economia. Quai duai succeder tenor il model dal chantun Tessin (dacurt ha il cusseglier federal Cassis declarà che las mesiras dal chantun Tessin èn admissiblas, perquai ch'igl exista ina situaziun d'urgenza, e quai vala er per las valladas dal Grischun talian).

Cuira, ils 14 da favrer 2018

Noi-Togni, Casty, Della Vedova, Atanes, Caluori, Casutt-Derungs, Cavegn, Deplazes, Dudli, Fasani, Kappeler, Lamprecht, Locher Benguerel, Monigatti, Niederer, Pfenninger, Thöny, Tomaschett-Berther (Trun), von Ballmoos, Costa, Gugelmann, Lombardi, Preisig